

## Recueil des principaux points du proces

*D'entre Maistre Francois Board Docteur en Theologie &  
Curé de Saint Geruais demandeur d'une part.*

*Et Maistre Guillaume Dompoinct deffendeur d'autre.*

**L**a feuë Royne mere du Roy tant qu'elle a vescu a esté recongneue pour patrône del'Eglise collegialle de saint Mor des fossez, & sur les presétatiōs plusieurs collations des prebendes d'icelle Eglise qui sont de fort petit reuenu, ont esté donnees par monsieur le Cardinal de Gondy comme Euesque de Paris, qui sont produictes au proces. Toutefois depuis son deceds pendant le trouble des creanciers d'icelle qui auroient faict mettre en crieas la seigneurie dudit saint Mor, ledit sieur Cardinal se seroit oposé a fin de distraire desdites crieas le droict de patronage desdites prebendes, mais par arrest contradictoirement donné au parlement de Paris le 5. iour de Septembre 1597. il fut deboutté de ladite opposition: & en consequence ladite terre a esté depuis adiugee avec ledit droict de patronage à madame la princesse de Condé: tellemēt qu'en l'annee 1599. ayant présenté à vne desdites prebendes lors vacante, ledit Board. il doit estre maintenu nonobstāt les empeschemens dudit Dompoinct présenté par ledit sieur Cardinal qui a desia cy deuant consenti par sentence audit Board la recreance, qui luy a toutesfois esté





inutile, n'en ayant perceu la valeur d'un liart pendant quatre ans qu'il a esté chanoine.

Tout ce que ledit Dompoinct dit au contraire est en somme, Que la possession de ladite Roynne mere a esté disputee, Et pour ledit arrest qu'il a esté cassé depuis quatre moys sur vne requeste civile par autre arrest donné au parlement de Rouen, qui a mis fin à la contention des patrons, iusques auquel temps par accord les parties auroient surciz leurs poursuittes, mais quād a ladite surseance elle peut bien seruir pour empescher la regle de *pacificis possessoribus* & nō pour exclurre ledit Board des moyēs qu'il a au principal, lesquels il s'est reserué par clause expresse dudit accord, & quand au trouble aporté quelque-fois à la possession de ladite Roynne mere à son desceu, ou par conniuece de ceux qu'elle auoit nommez, il a esté en fin couuert par les dernieres collations produittes au proces donnees par ledit sieur Cardinal à ceux qui luy auoyent esté presentez par elle.

Reste l'arrest de Rouen interuenu sur ladite requeste civile lequel sauf correction ne peut inualider la presentation qui a esté faite dudit Board par ladite dame princesse au tēps qu'elle estoit en possession dudit droit de patronage, en vertu tant de la continuation de celle de ladite roynne mere que dudit arrest du parlement de Paris qui auoit mis fin au proces, & qui au moins a deub estre executé nonobstant ladite requeste civile: car il faut confesser que ladite presentation estoit valla-  
ble lors qu'elle a esté faite *at quod legitime factum est non de-*



*bet irritari, licet ad eum casum deuenerit a quo incipere non potuit. C. consultationibus & ibi. gl. Ex. iur. patron.*

Aussi que par telle presentatiō il nest fait aucun preiudice à l'aduenir audit sieur Cardinal qui est vne autre raison de la decision dudit chapitre *Consultationibus*, par lequel telles presentations *quia sunt in fructu*, vallident quant elles sont faites par celuy qui estoit en possession du droict de patronage, cōme estoit ladite dame princesse, la possession de laquelle estoit de plus accompagnee de iuste tiltre & de bonne foy, resultant dudit arrest & du decret de ladite terre, ensemble de la possessiō paisible en laquelle ladite royne mere auoit esté de son viuant: tellement que si ledit Board a esté canoniquement présenté & institué il ne peut estre deboutté du droit a luy acquis *Ex post facto*: estant certaine la regle canonique qui veut *Canonicè institutum sine culpa non remouendum.*





